

四庫全書

集部

欽定四庫全書

集部

五百家播芳大全文粹卷七十一

詳校官侍郎臣劉躍雲

助教臣常循覆勘

總校官編修臣王燕緒

校對官中書臣葉蘭

謄錄監生臣張護

欽定四庫全書

五百家播芳大全文粹卷七十一

宋 魏齊賢

葉 棻同輯

朱表

國家祈禱

南郊禮畢奏告南嶽表本 汪彥章

茲者舉上高之儀遵皇祐之詔合祛天地升配祖宗蒙

仙聖之護持獲純精之陳薦冀垂景貺永佑丕圖

南郊禮畢奏告普賢菩薩表本

伏以少昊方秋上辛惟吉重屋青祠之禮肇講宗祈十
萬普現之身悉垂冥助既獲熙成之況敢忘昭報之私

明堂預告表本

蘇子由

潔誠至享近在外朝先事告成祇祓中禁企聖真於璇
極嚴科式於靈壇恍惚攸通福祥來暨冀玉殿而神享
迄升禋之禮成終始莫違上下蒙慶

明堂禮畢奏告景靈宮諸陵表本 汪彥章

比卜九秋之告躬陳五室之儀荷帝溥臨及時祇薦惟夙承於丕訓用克祭於嚴裡既享休成敢忘昭報

明堂禮畢奏告表本

蘇子由

親祠之重每三歲而後成陟配之隆及中辛而既舉顧菲薄而何有賴真聖以為依祇按靈科潔齋秘殿仙游降格神貺普存上保邦家之休下祈民物之定眇然微悃過此何求

明堂禮畢奏告表本

汪彥章

伏以比涓剛日祇見合宮天地同禋既盡靈承之禮祖宗並侑復殫孝享之誠仰獲顧歆實由乎佑冀永監觀之命俾承興復之功

明堂禮畢奏告表本

躬薦微誠克終大典致周公嚴父之志達聖人享帝之能顧非薄之何功賴仙真之垂祐歸依靡極荷戴不忘

明堂禮畢露香表本

大享告成舊章不墜適答昊穹之貺升侑文考之靈精
意潛通多福荐至敢因清夜躬薦薄誠

月朔奏告太祖皇帝表本

伏以時丁良月嘉萬寶之既成節逼週年悵三徽之將
復恭惟太祖陛下功彌宇宙澤浹華夷光垂鴻業之餘
燕及眇躬之嗣因節寒之始屆致時奠以遐思

星變禳禱表本

宋子京

星行於上厥有躔經政失其宜乃垂咎徵眷惟菲德久

荷鴻休不能躬屬於至誠乃使變生於常象敢祈丕造
特鑒微衷赦其召異之愆茂以致和之福

禳謝火星道場表本

汪彥章

推類而言惟至誠之獲相降衷於下非洪造以疇依既
祇被於殊庭蒙曲垂於昭鑒嘉與敷天之裕共承嗣歲
之休

國忌

奏告宣仁聖烈皇后忌辰表本 汪彥章

真游厭代厚祿在民適丁奉諱之辰式謹寧神之禮恭
惟宣仁聖烈皇后殿下功高任姒治格唐虞豈特六宮
永遵儀極之範坐令四海咸賴補天之功仙馭益遐孝
思何極

昭慈獻烈皇后贊宮旦望表本

宮壺興袞屢改階莫之旦寢園在望俄驚松柏之秋恭
惟昭慈獻烈皇后位正累朝德齊先后仙遊雖邈慈規
具存地隔三山莫獻蟠桃之實神歸九廟長遊大練之

宸適遇蕭辰何勝永慕

秋社表本

宮壺興哀屢改階奠之旦寢園在望俄驚松柏之秋恭
惟昭慈獻烈皇后儷天德大救物功深既煉石以告功
遞乘雲而不返追攀無及感愴奈何

中秋表本

長樂終天人結母慈之戀尊收告節月圓秋氣之中觀
玉瑄之屢易望栢城而增愴恭惟昭慈獻烈皇后體姜

任之德希黃老之蹤
倏赴帝鄉之期
永違天下之養
每懷遺訓徒極哀悰

九月旦表本

軒星既揜駢駕莫還
方興長夜之哀
忽屆杪秋之序
恭惟昭慈獻烈皇后
功參十亂道冠六宮
問寢承顏一朝
違長樂之養
祔姑合食
千載附秦陵之游
搖落有懷
追攀無所

重陽表本

種稜告成常帥九賓之獻菊萸在御莫伸萬壽之期恭
惟昭慈獻烈皇后厚德覩天徽音垂世自哀纏於厚夜
忽時及於週年爰致孝思式陳時薦

九月望表本

椒掖戒寒栢城無曉永隔神雲之馭倏更霑露之辰恭
惟昭慈獻烈皇后化首宮幃澤流寰宇念纂承於丕緒
蒙保佑之隆恩緬想徽音何勝孺慕

十月朔表本

繫結修天時丁良月雖闕宮之在望瞻大練以無階恭
惟昭慈獻烈皇后夢月鍾靈補天儷德奄隔晨昏之養
屢驚弦晦之遷茲覩流光何勝永慕

下元節表本

驗灰緹室將觀一氣之回校籍清都莫重三光之畢緬
思慈範永隔仙游恭惟昭慈獻烈皇后所憂在賢以儉
為寶方俟含飴之慶遽興復土之哀爰即嘉辰載陳良
薦

雅飾御容表本

蘇子瞻

於赫皇祖敷佑下民眷真宇之靚深儼粹容之肅穆雖
道存不變而體有從新既祇薦於科儀斯永安於像設

安御容表本

馭風雲闕既叅日月之光弭節琳宮尚答神民之望爰
開法會庶歎真庭願推往聖之心永錫函生之福

年節告裕陵表本

葦桃在戶徒講三朝之儀椒栢稱觴無復萬年之壽恭

惟謚號皇帝功施無外德治有生隨鼓漏之寢園莫親
饋奠望衣冠於原廟空極涕流

冬節告裕陵表本

歷紀天正史書日至感舒長於測景增怵惕於履霜恭
惟謚號皇帝德邁堯仁功恢禹迹遊衣冠於原廟徒仰
威神望松栢於橋山永懷悲悼

青詞

聖節

福寧殿啟建壽聖節道場青詞 王岐公

畫堂發慶適紀誕辰秘殿祈祥載敷妙式企高靈之下
墮監精素之上通永佑函生大延景祚

太清宮啟建壽聖節道場青詞

歲籥更端陰華生朏興言震夙之旦寶擁神靈之休爰
即真祠具敷冲式冀上穹之默鑒錫邦祚之丕隆

上清觀啟建天寧節設醮青詞

草芥雖微皆出乾坤之造君親有慶共殫臣子之誠屬

誕聖之昌期竭籲天之至懇筵張邃宇像設殊庭冀回
赫赫之光俯察區區之意伏願顧諟明德惠綏永圖志
上下以咸同時雨暘之晝若九州四海日陶有耻之風
億載萬年歲獻無疆之壽

福寧殿啟建天慶節道場青詞

禧動年芳華生月朏仰祥符之盛烈膺上帝之靈文載
歷嘉長具循先制祓九重之秘宇舉士極之冲科庶恢
道甫之宗永介皇圖之固

福寧殿啟建天貺節道場青詞

珍符發瑞嘉節標期披太素之琅書企紫宸之芝御伏
眞密誠上格靈貺下敷助永昌圖歸勒大道

靈籙殿滿散乾文節道場青詞

正陽之月震誕紀期涓闕殊庭以延飈仰瓊科藥笈修
袂以虔伏奠高儲靈垂佑寡德邦歷之固與民均休
仰答至神匪誠敢怠

福寧殿啟建先天節道場青詞

徂暑收辰素商臨候稽靈源於道左啟丕祚於皇基載
肅殊庭甫虔法會欽若王神之右永惟重器之承敢怠
至精以懷其蔭

靈釐殿滿散同天節道場青詞

祇紹慶圖仰繫靈顧屬恢台之布序實誕育之紀辰爰
即秘庭夙崇法會甫畢齋修之素終蒙保佑之仁

福寧殿滿散先天節道場青詞

寶系自天珍符在國適紀素商之序夙清秘殿之筵探

道蘊於琅函企真游於紫極至誠內罄冲祐長孚

萬壽觀啟建乾元節道場青詞 孫夢得

炎序開端誕人命節惟冲人之紹歷蔭靈廕之紹休爰
啟殊庭載嚴淨式伏冀俯回鑒諷荐錫嘉休永嘉卜世
之基彌固如山之壽

福寧殿啟建天祺節道場青詞 王岐公

圓靈孚佑寶命來符載承先烈之休又紀嘉辰之會夙
探冲式遍繹真文冀神造之博臨錫邦圖之永久

靈登殿滿散同天節道場青詞

大統當天三陽表夏紀靈樞之夙照陳秘洞之重科
逖欽不宰之私默下有生之施終回冲監永作皇休

玉隆觀啟建乾元節道場青詞

茂樹交秀薰風導和當炎靈化育之初實眇質誕生之
候普膺聖護叅荷真休奉春秋則廟社歆寧御遠邇則
兵民保乂敢憑醮席恭導虔誠庶資薰潔之修仰達紫
清之鑒洽敷順氣丕冒群倫

福寧殿滿散天貺節道場青詞

秘殿集靈仙符紀節祇循綠蘊之範遐禮紫虛之游伏
冀感真洞元右德錄行陶物生之大順錫邦祚之鴻休

洞霄宮啟建乾元節道場青詞 文士頌

月旅正陽當百家之茂盛祥標誕節期萬壽之穹窿式
按舊章載嚴秘殿延紫霄之飛馭誦玉笈之靈篇伏冀
誠懇上通聖真垂佑賜之多福均動植之微幽永以無
疆並乾坤之悠久

福寧殿啟建先天節道場青詞

秋迎新朔節紀佳辰感靈系之肇祥企高晨而薦信瓊
科按式玉笈繙文庶道法之自然以資功於不宰俯回
冲監終佑皇圖

明道觀啟建先天節道場青詞 孫夢得

暑伏畢期商秋開序稽道祖發祥之兆迺先朝紀節之
辰恭建清場載循舊矩寶薰交馥真典遞賡伏願精意
上交太慈光照生民饒衍廣宇泰寧

福寧殿啟建先天節道場青詞 王岐公

徂暑收節涼颺應辰稽道祖之生期啟皇圖之永祚有
嚴邃宇式按冲科揚維大寶之承欽若上靈之睠敢忘
顒慄以嚮順祥

福寧殿滿散先天節道場青詞

寶系發祥真符告祚肇素焯之凝候即秘殿以陳科集
供清場致精道果期九真之迪蔭保百世之延供仰答
顧懷敢忘顒慄

福寧殿滿散天祺節道場青詞

大象開先必根於元造寶文騰瑞載紀於嘉辰按叅聖
之舊彛企高辰之列御終祚明烈永孚順釐

福寧殿滿散天貺節道場青詞

上靈顧德早錫於休符季夏協辰載臨於嘉節神謀燕
後寶歷垂鴻益嚴三景之科遙貯九闕之御幾崇妙蘊
仰契真風

靈釐殿啟建皇太后生辰靈寶道場青詞

王岐公

良月戒寒純坤厚宅紀慈闈之誕序會聖歷之嘉辰前
被殊庭具敷靈式庶演真風之妙永同皇祚之休

靈釐殿滿散皇太后生辰道場青詞

孫夢得

尊履皇圖考申母養屬商飈之御氣紀沙麓之開祥夙
採秘洞之科屢揖玉真之御庶資道妙丕錫時休

觀文殿滿散皇太后生辰道場青詞

文士穎

冬籥道寒應就盈之良月母闈鍾慶紀載誕之休辰敞
別殿之清場研上清之妙教庶續慈靈之茂永均皇歷
之昌

本命

奉元殿啟建皇帝本命道場青詞

汪彥章

正陽紀月元命屆辰仰叩清都恭開靖會舉靈文而參

講集芳品以具陳伏冀肝鬲儲精希微降鑒垂在天之
仙蔭祚卜世之皇基

鴻慶宮啟建皇帝本命道場青詞

汪彥章

別都之奧皇運啟基作為靈宮館寓衆聖顧循妙質嗣
撫休期屬歲律之垂秋推命元之協日載嚴道式丕迓
純釐

慶寧宮啟建皇帝本命道場青詞

孫夢得

猥以涼德獲承至尊顧慶寧之新宮實明兩之舊邸肆
惟丕命之發式是群靈之扶歸命高真資閱妙蔭

壽星觀啟建皇帝本命道場青詞

文士穎

四時回復萬化氤氳祇荷寶圖聿臨元命仙廷之閱列
御所棲仰薦精衷庶回道蔭

萬壽觀啟建皇帝本命道場青詞

孫夢得

日晷遄幹農場畢登眷惟令辰將及元命潔修道會寅
啟仙都奠霄極之鑒觀祐聖真之綏佑誕清寓縣豐庇
生靈

會真宮啟建皇帝本命道場青詞

孫夢得

涵象紫虛實純本生之氣秘言丹錄蓋司定命之文考
日道祥按科嚴供祓殊庭之中邃佇靈駕之下綏留鑒

精明輔延昌熾嗣安丕運永嚮真風

崇福觀啟建皇帝本命道場青詞

孫夢得

承天之序享國之安適臨元命之期仰懷乾坤之厯延
真秘宇按式清壇跂遐福於太清保皇圖於永祚

太乙宮啟建皇帝本命靈寶道場青詞

孫夢得

揚惟眇躬欽被景厯大時播氣元命應辰適臨炎籥之

中預啟珍臺之會瞻玉晨之絕致迎知御之下遊願鑒
忱思孚垂惠蔭

建隆觀啟建皇帝本命道場青詞

王岐公

首春開序元命屆辰爰被殊庭俾陳勝會亶賡揚於妙
善祈仰格於高真密諒衷懷交敷載穀寶圖丕固仙廡
永休

崇禧觀啟建皇帝本命道場青詞

王岐公

大火臨墟實肇基於王業羣飈泊館爰系迹於真風顧
蒙寄於丕圖薦推存於始命往即殊庭之夕具宣元洞
之科精志所孚皇休是祚

鴻慶宮啟建皇帝本命道場青詞

王岐公

九清右下陰扶皇祚之延六氣旋中環次命元之紀肅
依道宇明按真科敢薦誠忱庶迎福順

明道觀啟建皇帝本命道場青詞

王岐公

天心丕應兆新邦統之誠月律再移旋次命元之紀
瞻秘館素宅靈區載陳瑶席之芳具繹琅書之蘊伏冀
飈游格馭斗籍著符終繫覆露之人永保熾昌之祚

延祥觀啟建太皇太后本命道場青詞

王岐公

尊履皇基孝行綿宇方極祖慈之養薦臨元命之辰按

靈步於行暴演冲科於秘館庶誠忱之上格錫壽祉之
丕延

慶寧宮啟建太皇太后本命道場青詞

王岐公

淑律收華炎煒御氣驗清臺之新厯紀慈殿之元辰夙
敷秘洞之科緬想高辰之馭庶綏神右常協邦休

太乙宮啟建太皇太后本命道場青詞

王岐公

茂績皇圖尊承慈壺屬陽春之季月紀元命之嘉辰爰
祓殊庭仰延法御庶默回於圓造用丕錫於靈釐

萬壽觀滿散太皇太后本命道場青詞

王岐公

煥幄延真肅揖飈游之駕珠臺按式載披寶籙之文既
齋明之盡誠亦盥饗之來顧終延妙本永薦慈休

坤寧殿啟建太皇太后本命道場青詞

王岐公

荷天休命嗣國丕基早承祖養之慈時及命元之紀企
列真於上極宗衆妙之高風庶默下於靈觀用蕃膺於
冲祉

奉元殿啟建皇太后本命道場青詞

王岐公

母儀正位極致養於孝誠神造主生推發祥於元命屬
上冬之吉序敷三洞之靈科庶集冲釐均休皇祚

太乙宮啟建皇太后本命道場青詞

王岐公

孝尊長樂序戒元辰禁館敷筵仙函發籙伏奠上真垂
祐寶祚均長敢薦信於靈觀永希風於道甫

慶寧宮啟建皇太后本命道場青詞

王岐公

慈闈致養方率孝於群倫寶律薦時載辰推於元命即
列真之邃宇研諸妙之靈文庶歸蔭於道風益均祥於
皇祚

西太乙宮啟建皇太后本命道場青詞

王岐公

長信奉親必極天下之養元辰本厯載當冬仲之期緬
欽不宰之私默系有生之命延羽禱之上侶按瓊科之
妙儀庶閱道於真風益輔祥於永祚

國家祈禱

祭祀

金龍玉簡

南郊預告道場青詞

祇嗣慶基六舉裡燎幸萬物之時又間四方之少虞三

歲於茲舊章可述已圖嚴配前喻收司外極馨嘉中率
虔鞏庶申昭事式啟蕃禧

南郊預告道場青詞

比卜天正躬煬帝燎百神來職萬乘戒期惟大事之方
勤勵精衷而有恪特蠲嚴室敷迪齋科歷諷琅音上祈
聖祐幸鴻儀之克展決黎獻之太和敢怠日修仰酬天
薦

南郊預告道場青詞

薦誠吉土拜貺上天率三載以為常普四方而助職幸
邦治定加歲順成奠藏上儀仰字下燾已叮嚀於先甲
俾䟽淪於羣靈蠲奉有加須求無擾仰惟真鑒垂慈至
虔

南郊禮畢道場青詞

天燎告誠帝暉臨享自六飛之出次逮百執之戒嚴氛
霧廓除霄晨澄潤休光充塞協氣臻翔荷衆聖之顧存
集中區之昭泰是用祓蠲秘宇啟設真場召敝服之列

官紬瓊函之奧蘊庶緣報禮祇答純休威咫尺不違景游
垂鑒

明堂預告道場青詞

蘇子由

嗣守丕業於今年躬祀總章方期再見講魯之舊當
先事於泮宮稽國之常亦預期於中禁祓除祕殿祇俟
真游降福儲祥望旋霄而非遠奉珪奠幣奠釐事之有
成

明堂禮畢道場青詞

汪彥章

比講嚴禋用昭美報荷三靈之降鑒致百禮之脩成敢
修秘笈之儀用企叢霄之馭庶扶景祚永格殊休

明堂禮畢道場青詞

蘇子由

茲因聽政之區當修享帝之祀陟配文考大賚四方禮
成不為神貺昭答念非寡德之致願依妙道之餘祇祓
禁塗遠迎真馭誠心上達微供獲仁

禋饗預告青詞

歐陽永叔

宗廟之嚴禋宗為重乃卜孟冬之吉躬修合食之儀仰

企上靈真孚陰佑俾克成於盛禮奠永錫於純禧式展
孝思用膺神貺

禋饗預告青詞

宋子京

裸玉奠芳徧躋於左廟星旌燭影遂集於陽郊窳企清
都回經馳道式車示謹罷蹕戒喧方祇燎於天柴聿除
精於幔省仰祈真蔭助畢鴻儀

廟祭預告青詞

今者屬圖誌祀先見高真叩寶宇之靖嚴滌瑤觴而伏

獻眷惟秘宇夙奉慈闈顧奠鬯之難兼委薦紳而攝告
靈游無隔精意幸昭茲者躬款殊庭祇見真祖茂瞻玉
理進袞霞觴眷惟慈寢之嚴夙厚慶源之蔭已詔職事
攝奉舊章願委餘禧以光降祚

四瀆投送金龍玉簡青詞

孫仲益

妙道希夷實司於化育名區邃邈久宅於真靈向因文
考之諱辰仍屬華年之首序肅延淨侶祇袞清場秘蘊
交敷冲科並講俾遙投於信簡庸庶示於虔誠伏冀擁

順祥釐均消祲沴決於廣宇綏此羣生

茅山金山投送金龍玉簡青詞 王岐公

神畿之輿璇館凌虛道祖之靈蘿圖系慶比按三清之
式爰敷九曜之筵薦玉景之高聞達龍淵之至信永孚
妙蔭下錫丕祥

金山水府投送金龍玉簡青詞

祥開誕序會集仙科秘府渟淵式通妙道行龍傳簡庸
達信章緬企真風益孚靈鑒

玉京洞金華洞投玉簡青詞

至妙者道之宗無私者天之總維時莫春之序載祓禁
庭之嚴寶籙披函飈游下席既格衷於靈鑿旋錫祉於
皇圖瑶簡傳龍以將至信

金山水府送金龍玉簡青詞

南有靈淵下溥秘府屬上郁之敞會按三洞以成科載
刊瑤簡之文用致金龍之信庶孚冲鑒永祚純休

張公洞投送金龍玉簡青詞

太極涵元上真凝化顧纂圖於皇序期斂福於群生跂
景層虛按科靈宇逮清壇之已事託寶信以馳誠庶格
齋顛用孚眷祐

河陽濟瀆北海水府投送金龍玉簡青詞

王岐公

地控靈區淵臨邃府肅陳醮席欽迓飈游藻笈披文式
導冲範

四瀆水府投送金龍玉簡青詞

紫極涵元宰群生於下土珍臺寓聖演真教於上都遐
瞻洞府之嚴素宅神靈之粹式將秘簡以傳行龍維誠
信於所交諒幽通之靡隔

四瀆北海水府投送青龍玉簡青詞

王岐公

氣明薰序神發誕符解秘館之冲科集紫虛之上果遐
企列真之御俯臨靈委之淵達編玉之鏤章傳行龍之
闕信庶孚情悃丕錫蕃祺

金山水府投送金龍玉簡青詞

靈淵徹洞本為仙府之居信簡傳龍蓋舉道家之範屬
上都之演教瞻秘境之投誠庶格冲觀俯垂妙蔭

集禧觀啟建年交道場青詞

運薄星回歲陰垂暮年華物始春籥行新顧承大統之
休夙被三靈之蔭念薦更於順序思歸順於元功前祓
殊庭按陳法席遙佇飛颺之駕下歆甘露之羞

萬壽觀啟建年交金錄道場青詞

王岐公

四氣播時屬年陰之中紀三期啟朔方物表之乘春睽
眇德之承基思泰和之蒙宇預敬真廷之會大陳寶錄
之科庶履歲元溥綏邦祉

醴泉觀啟建年交金錄道場青詞

王岐公

天回星紀物動年華驅積沴於故陰導泰和於首序講
有冲式布於靈場仰至鑒之博臨錫庶生之丕茂

福寧殿啟建正旦祈福道場青詞

歐陽永叔

四時成歲嘉品彙之咸新百福自天荷衆真之冥貺俾
開靈囿恭講仙科恢寶祚之延長錫壽康之遐永是惟
降鑒享乃克誠

太乙宮啟建正旦祈福道場青詞

宋子京

真游飈歛秘殿邃嚴惟首月之正時叶新陽而布慶俾

陳法供仰薦明誠伏冀敷佑眇躬保千齡而永固躋民
壽域均萬國以同休

洞霄宮啟建立春祈福道場青詞

宋子京

和歷發春蒼神受職肇生萬寶平馭九農瞻惟岳靈分
奠坤載乘熙春之啟序肆華醮以迎釐披蘊祈真潔薰
攘癘庶緣神貺有庇羣元

崇禧觀啟建上元祈福道場青詞

宋子京

月御分天造紀寅杓之半仙圖校福並會紫都之嚴祇
奉靈辰普修青紀分遣有位即禱殊庭竚飈駕於鴻蒙
介神祺之盻蠻所冀蚩蚩億姓蠢蠢群生富壽坐躋茂
靈交遂永堅淳濯仰奉高明

萬壽觀啟建上元祈福道場青詞

歐陽永叔

萬物熙春肇新陽於首歲三元紀序標令節於真經爰

即靈場俾遵秘式薦雖陳於菲薄誠已達於精明伏
願穹昊垂休紫清降監邦家錫慶永叶於泰寧民物遂
生並臻於和樂

醴泉觀啟建保夏道場青詞

元氣斡旋時惟炎序珍臺嚴邃宅宇仙遊披縈笈之冲
篇被靈壇之芳薦仰控紫閣之鑒異調玉燭之和

崇福觀啟建中元道場青詞

秋籥云初月靈絃望仙真普會校錄素嚴深詔攸司秩

修常典分就殊庭之秘肅陳芳獻之華諷譯內音振除
群累拂塵為悟濟苦而歡仰高極之喜慈恆有生之護
貸顧臨蠲潔開佑福祥寡德蒙安齋誠敢替

福寧殿啟建中元祈福道場青詞

宋子京

肇秋之辰既望之夕候仙都之校籍即秘館以敷筵夙
稽三洞之科緬佇九清之薦

奉親廣孝二殿啟建中元祈福道場青詞

宋子京

方秋之初維月既望將登年於素律適校籍於丹臺夙
探靈科仰要冲顧庶恢風於妙有益助福於遐升

萬壽觀啟建下元祈福道場青詞

毛伯穎

良月望舒當大冬之含育下元校籙屬羣聖之會同仰
憑陰隲之慈輒備禱祈之禮吉蠲壇席稽按科儀延飈
歛於紫清罄悃誠於丹素伏願真靈孚佑慈寶鑒臨崇

降嘉祥祓除災厲誓竭精純之守仰酬洪覆之恩

景靈宮啟建下元祈福道場青詞

毛伯穎

時屬初寒月臨既望方仙都之校籍俾真館以陳科下
垂圓監之臨丕錫涵生之久仰依妙用終竭至忱

太乙宮啟建下元祈福道場青詞

毛伯穎

珍羞寓席延上極之列真實律還陰屬下元之佳節集

羽裾之淨侶繹瓊笈之冲科庶格靈觀用均邦祉

五百家播芳大全文粹卷七十一

欽定四庫全書

五百家播芳大全文粹卷七十二

宋 魏齊賢

葉 棻同輯

青詞

祈嗣保慶

後苑祈皇嗣保安道場青詞 歐陽永叔

廟社降祥宮庭叶慶載蠲吉旦交薦明誠期仰格於清

真俾敷延於祉福永昌期祚遐企靈休

福寧殿祈皇嗣催生保慶道場青詞

汪彥章

高穹降慶方垂祐於邦家彌月告期用薦誠於科錄異
衆真之昭鑒臻百順以儲休

後苑催生保慶道場青詞

正陽旅月載育開祥式因靈守之嚴交薦精衷之潔虔
望衆真之貺敷昭百順之休永祚皇圖寶希道蔭

禁苑催生保慶道場青詞

宋子京

恭念以眇眇之身奉丕丕之祚祈天錫美嗣歷無疆顧
此嬪幃就安乳館永言穹昊夙庇宗祧敢通醮於藥宸
願委慈於禡蠲克生而育俾熾而昌罄露至誠仰須祺
祉

後苑催生保慶道場青詞

誕彌叶慶蠲潔修誠嚴秘殿於靈宮誦真文於藥簡通
此苾芬之薦袞其災害之虞仰冀昭回丕符鑒祐

後苑催生保慶道場青詞

吉日迎祥靈祺叶慶爰即清真之宇虔修科式之儀冀
袪滌於害災俾敷昭於福應載昌儲慶永祐基圖

後苑催生保慶道場青詞

祠謀叶應彌月告祥肅依科錄以薦誠仰冀照臨之降
鑒錫之祉福佑以休寧惟集慶於邦家永延鴻於基緒

後苑祈皇嗣道場青詞

聖真所居靈感斯集屬擁休於廟社將儲慶於宮庭生

聚仰禧幅員翹庇載馳使命恭叩清都誠款罄伸寶香
交馥伏願神威溥護法力扶持朱芾講儀早繼斯皇之
詠瑞曦騰耀益隆久照之期言念虔詞不勝企禱

禳謝

集禧殿禳謝火星道場青詞

汪彥章

統輯群元懼德莫勝於厥付導迎休應惟真曲赴於所
祈茲緣駘蕩之辰懼有鬱攸之沴敢延冲馭俯鑒靈場
真憑敷佑之仁永享平安之慶

福寧殿啟建禳謝彗星道場青詞

汪彥章

上帝聽邇每示人以灾祥一人保圖必畏天之威命乃
妖文著於營室戾氣厯於金方竊循災變之由實致瓊
涼之懼用按科於秘殿方謁款於高穹庶蒙降鑒之私
以返在躔之象

福寧殿滿散禳謝彗星道場青詞

汪彥章

太史占文西躔爾變顧天東之靡測省邦咎之所從內
格至精仰孚靈鑒忽妖芒之澄象致順氣之凝休益厲
菲思庶符元祐

紫宸殿醮禳星變道場青詞

猥荷丕圖薦鍾否運每寅恭而事帝懼灾沴之及民乃
者時屬杪秋星違常度念謹告曾無於虛是必咎愆有
瀆於升聞夙夜靡遑與形俱惕即名山之勝境修大洞
之名科仰真真游俯回靈鑒亟垂消去之福永啟繫隆

之期

太乙宮為民禳災天皇九曜道場青詞

汪彥章

天聽之卑速下灾祥之告君應以德敏如影響之隨比
春律之向闌乃星躔之示變爰被華林之會仰延歛駕
之休至誠格於靈觀順象澄於妖晷益懷修省之懼庶
答盖臨之私

太乙宮啟建祈福道場青詞

蘇子瞻

臣以冲眇嗣承列聖之休躋於艱難實賴文母之德臨
泣四載勤勞百為畏天之威未嘗終日而豫怠視民如
子惟恐一夫之困窮伏願上帝降祥衆真垂祐修禳灾
沴永底壽康恭陳寶籙之科仰扣神游之館敢祈昭鑒
上察孝心

慶壽宮慶土道場青詞

尊奉慈闈大興寶宇屬衆役之甫就宜群靈之所扶夙
探秘洞之科仰企回飈之御冀通至信永錫順祺

皇太后禳灾道場青詞

坤元毓德夏清在辰方色養之殫誠偶時禴之爽裕敢
祈珍馭俯即禁楹曲垂神鑒之私永集慈闈之慶

雨暘祈禱

醴泉觀啟建祈雨道場青詞

汪彥章

時當長夏旱至累旬力穡有秋徒極嗟吁之請密雲不
雨未知霑足之期顧咎徵之匪虛皆菲躬之所召伊民
何罪惟帝降衷起潛伏之群龍徧行膏澤蘇焦枯之百

粟坐致豐年長與群生恭承景貺

醴泉觀啓建謝雨道場青詞

文士穎

當陽肆虐驚萬彙之如焚至道無私愍群生之何罪果
蒙潤澤普濟焦枯敢誇閔雨之誠實荷大生之德三農
有望百室將盈仰企雲霄莫酬造化

中太乙宮啓建祈雨道場青詞

雲行雨施式資百物之亨火見金藏懼致驕陽之害嘉
生若馮比屋可隆輒殫懇迫之誠上瀆蓋高之聽仰祈

昭鑒俯祐下民和氣致祥五一風而十一雨大田多稼
千斯倉而萬斯箱凡屬含生均蒙道蔭

中太乙宮啓建謝雨道場青詞 宋子京

清和屆辰愆亢為沴念言動植憂沴夙宵庸罄至誠仰
祈靈祐果膺顧答遽錫蒸濡物品載融農疇茲洽敢致
清潔之薦庶伸昭謝之懷

福寧殿啓建祈晴道場青詞

積陰成沴淫雨過常遽貽比屋之咨將失甫田之望念

流灾之所自由菲德之致然敢厲精誠庶回休證

福寧殿啓建謝晴道場青詞

災異之作誠告孔昭方仲秋之御辰乃淫雨之為沴惕
奉明威之鑒遠承休應之來敢罄精衷以祇靈造

紫宸殿啓建祈晴道場青詞 歐陽永叔

素積適中積陰為沴眷言靈雨之變罹此下民之災載
竭精衷庶孚善應祓秘楹之靖密按寶籙之淵微永錫
順祺丕冒涵宇

紫宸殿啓建謝晴道場青詞

積陰貫辰沴雨傷歲顧天灾之暴降懼邦治之大么適
通至誠俄塞巨變終歸仁於元造永垂福於涵生

洞霄宮啓建祈晴道場青詞

大田多稼均有望於青成三日為霖恐或貽於物害敢
殫微懇恭扣上真伏願矜閔黔黎埽除陰沴雲翳廓開
於四野五輪顯照於中天百穀既收三農共慶

御容

雅飾御容道場青詞

歐陽永叔

珍宇邃嚴奉真虛而有素玉容清穆謹修祓以惟時爰
按仙科俾伸虔告載瞻道蔭宜永冲誠

雅飾御容道場青詞

蘇子由

威神在天像設有位稍經歲月寢失光儀輒因虛科以
告增飾真聖所依宜極華煥歲月既久必有增嚴茲因
吉日之良敢告飾上之始

安御容道場青詞

歐陽永叔

靈峯甚峻仙宇載嚴爰考吉辰奉寧聖像式伸祇吉昭
鑒乃誠

安御容道場青詞

蘇子由

靈德常新威顏有耀儼若斯民之望恍然真馭之臨肇
自殊庭即安珍館稽首延佇降福無疆

遷御容道場青詞

蘇子瞻

於皇神考肇啟秘祠方增築於未寧懼格思之有瀆別
嚴淨宇祇奉睟容式燕聖靈永綏慈嘏

國忌

景靈宮啟建仁宗忌辰黃籙道場青詞

蘇子瞻

聖業垂鴻覆及眇躬之御仙游趣駕迅驚流景之仙撫
遏樂之初辰即棲真之列宇茂敷冲式欽繹靈佑庶格
道於上圓益侈祥於後葉

英德殿啟建英宗忌辰道場青詞

王岐公

法馭賓空未隔顧言之遠流陰易節早臨諱日之初瞻
遺像於原祠發冲科於秘笈庶嚴道範益輔神遊

景靈宮啟建英宗忌辰道場青詞

王岐公

六駕神螭莫返乘雲之旆雙擎仙掌載驚零露之辰追
末命於當年演冲科於別宇庶恢妙用益薦遐升

資薦神宗投送金龍玉簡道場青詞

王岐公

嗣膺丕祚追奉先猷悵寶馭之賓空修芳陰之環歲瓊
科敷蘊既薦福於真庭玉簡載符庸通誠於秘府庶回
靈爽仰助遐升

資薦仁宗投送金龍玉簡道場青詞

王岐公

大行不復永慕仙遊三洞按科具資道果撤青場於禁
宇投寶信於靈科願契真風往賓妙境

資薦哲宗黃籙醮青詞

天上去留本輕於脫屣人間哀樂徒重於遺弓邈焉丹
水之遊痛矣白雲之遠雖傾河而注海豈勝涕濡顧隕
首以喪元莫酬恩遇恭念清真之典具嚴祈醮之文啟
金錄以陳儀顙丹霄而請命伏望高穹昭鑒列聖况臨
矜罔極之至情助無疆之廣福綏我先后燕於太清靈
馭逍遙仰威顏而莫見帝鄉寥廓固妙體以常存永儲
宗社之休溥錫臣民之慶

資薦哲宗大祥道場青詞

遺弓已遠新穀既升恭啟靈篇式嚴颺馭雲霞在望已
陪帝所之遊霜露已濡猶極人民之慕益敷餘祉大庇
含生

集禧觀啟建仁宗百日道場青詞

汪彥章

仙輿趣駕莫攀上漢之遊宮隙流陰遽又踰時之慕建
妙儀於別境摹法會於諸天庶格精因更資遐陟

資薦隆祐皇后首七道場青詞 汪彥章

形管載功方紀關雎之化禕衣告復忽虛長樂之朝顧
游景之莫留集哀悰而如割敢祈珍衛俯降靈場庶緣陰
騰之仁益廣遐升之福

資薦上皇大祥道場青詞

神聖千齡而厭世已忝仙馭之遊日星一歲而周天俯
及期祥之候禮經有制孝感無窮輒殫螻蟻之誠仰答
乾坤之造申嚴秘典祇祓清場諷琅函寶笈之文塵金
闕玉關之聽上祈天監敷錫神禧仰資既往之靈齊光

北斗更福中興之聖比壽南山

資薦上皇大祥道場青詞

聖王之禮期年而俯及齊祥臣子之心沒齒而不忘孝
感屬茲哀慕輒罄悃誠上祈皇覺之功式助仙遊之樂
伏惟太上皇帝陛下道包有截德被無疆條爾歸真盡
然永慕鸞儀天仗願遊上帝之廷鳳曆蘿圖永作後昆
之福

生日

生日祈禱道場青詞

陳丞相

二年居里常懷糜廩之慙累表叩閭未遂乞骸之請敢
殫誠赤仰瀆員清伏念臣許國何功逢辰竊幸已迫桑
榆之景尚貪香火之緣止足不知滿盈是懼薰心惕厲
慮晚節以難全病骨支離念此生之餘幾屬辰誕毓祇
薦薰修爾壽爾昌已荷乾坤之覆載將安將樂更期雨
露之生辰

生日禳災設醮道場青詞

唐子西

有生之衆所欲不同貧者願乎多財富者期于不死賤者志求于顯達貴者思保其久長人既無厭神難以應臣雖無似志實不然雖亦有禱于三清惟乞無災之二字但以私門多故歷歲不寧齒髮變于艱危精神耗于憂慮爰因生日虔扣上真庶幾天高而聽卑所謂物窮則反本使身心安穩尚復何求寢食康寧便為至足其他外物一付自然既所請之甚微宜必從於祈禱

生日祈禱設醮道場青詞

天無私覆播萬彙以生成道非常名融一心而感格聲
危衷之端慙望虛鑒之昭回敢以誕辰恭修芳醮琅函
藜笈披三洞之秘文絳節霓旌延九霄之飛馭願垂歆
答俯應祈求所冀先世光靈盡蒙遷拔此生愆咎咸賜
蕩除保身氣之安強錫壽祺之龐固齋戒以享上帝夙
罄修誠陰隲而福下民竚垂善應

生日祈禳設醮道場青詞

趙莊叔

臨下有赫孰窺不測之神應天以誠或動蓋高之聽伏

念臣質弱多病性昏不靈雖知忠孝以盡心常懼寵光
之過分敢以始生之旦仰祈真聖之恩妙力所加諸惡
莫作錫以多福蕃以後昆齊心潔誠永求歸于至道竭
力盡瘁庶無愧于明時

生日賽願設醮道場青詞

妙道淵微非塵凡之可測圓穹杳邈有誠信之難通輒
陳悃悞之私上瀆蓋高之聽伏念臣叨恩三紀從事六
官勤勞更歷于歲終修省無忘于夙夜昨於正旦常起

願心許大醮之祈禳乞靈休之保護今逢誕日恭按科
文集道侶於壇場頂粹容于香火仰回聖馭曲享清修
伏望上帝垂慈列真降佑延徧親之壽考茂合族于禧
祥三考書成祈有代更之慶百神來相俾無灾滯之虞

生日祈禳設醮道場青詞

陳丞相

身惟許國何施汗馬之勞老合歸田尚竊真祠之祿昌
報乾坤之施備殫螻蟻之誠伏念臣起自書生濫儕朝
序際聖明之熙運叨內外之要司既霑孤棘之聯復玷

公珪之峻德涼才薄愧浮食之罔功福過運衰知來日
之餘幾興言及此殊用慨然况疾病之相乘知滿盈之
是懼屬逢良月復屆始生平安少假於頽齡止足庶希
于前哲敢陳菲薦上瀆高真百歲而七十者稀已過平
生之願一善而千灾可却尚垂洪覆之恩

生日祈禳設醮道場青詞

監觀四方天蓋垂於顯道齊明盛服人必効于敬心臣
冒寵清時偷閒暮景滿盈是戒敢忘止足之恩疾疢易

生每幸康寧之保皆化工之攸芘豈綿力之可酬適屆
初春虔修羞供伏願上元校錄均庶惠以承休投老年
齡與闔門而無恙

生日祈禳設醮道場青詞

日月照臨何幽弗燭乾坤覆載有感必通輒殫不息之
誠仰瀆蓋高之聽伏念某性質殘暗道力單微既舉足
以屯危遂觸途而艱厄爰值始生之日聿懷洪造之恩
竭忠披衷誓期鑒照陳詞瀝悃願賜護持斯言上陳此

中心惕

生日祈禱設醮道場青詞

仰洪造之難名不私所應竭愚衷而昭事式表其勤惟
冀免灾敢云要福伏念臣叨塵仕版薦領戎行揣已奚
堪感知有日惟是桑弧載生之日輒修蘋藻可薦之誠
伏願上帝居歆圓靈錫羨忝造化爐中之物咸與為新
載生辰宇內之天其寧惟永洽於屬類介以平康

生日祈禱設醮道場青詞

陳丞相

老合歸田方遂乞骸之請功何報國更叨增秩之榮敢
瀝丹衷仰干洪造伏念臣朴愚自守悃悞無華偶際會
於昌辰浸叨踰于顯宦熏心惕厲慮深切於滿盈病骨
支離患每虞於昃食茲逢良月復屆始生輒羞菲薦之
誠上瀆高真之聽知止知足已休退于邱園將安將樂
更歸投於穹昊

生日祈禳設醮道場青詞

毛伯穎

九天稱慶五帝監生載惟夙昔之初實本圓清之造歲

時遄復日月載臨蹈世諦之垂逢豈無愆咎圓星躔之
盈縮或值災危思培植以福基望增延于壽數按清紫
之真教依黃籙之明科祇肅雲衢仰延風馭靈壇芬席
備三日之彛儀丹篆朱章罄一心之悃款祥光下矚嘉
事告成伏願慈寶鑒臨仙真孚佑北都泉曲祈既往之
超升南極朱陵錫見存之誕永家門帖泰世路享通誓
堅信順之誠仰答顧歆之造

生日祈禳設醮道場青詞

大矣乾坤曲示含洪之德微如螻蟻輒伸懇禱之誠仰
瀆高真俯祈照鑒伏念臣奔馳薄宦困躋孤踪合門叨
飽食之恩晚歲荷帡幪之庇屬逢良月適屆始生虔修
醮謝之恭少効涓埃之報拔谿毛而薦潔冀風馭之來
臨惟欲免災誰云要福永無坎險俾壽考以康寧果獲
泰亨庶提攜於長幼

生日設醮清旦青詞

九霄寥邈垂科教之謹嚴三獻吉蠲備情文之祇肅方

此群陰之伏迨茲申旦之初延遯高穹敷陳精意錫之
多祉瀆以遐齡惟德動天敢自忘於惕厲大鈞播物實
仰賴于函蒙

生日設醮道場青詞

葛謙白

蓬矢門闈載遇始生之旦藥珠宮闕久俯至道之宗輒
翰翼翼之感仰瀆高高之聽伏念臣某早膺擢序寔冒
寵光雖托覆圓穹默荷吉祥之相然甄形大塊或虞災
沴之侵將俯誕辰恭修醮會奏諸天之隱韻諷太上之

真詮絳筆書詞虔拜章於玉闕銀編鑄簡願益筭於金
房

生日設醮道場青詞

合僕帝先孰測希夷之妙宣功天載是彰覆幬之功爰
仗至誠仰祈丕應伏念臣久承道蔭早襲官聯惟仲秋
敷英之三遇誕日垂弧之六特麗法會公按仙科肅羽
客之淨儀諷琅函之隱韵所異九霄孚答三境居歆騰
飈馭于玉宸亨馨羞於瑤席鑒茲蠲潔昇以吉祥被浮

沴于身宮愆修期於斗籍

生日設醮道場青詞

黃泰之

衆靈森布實司造化之權一氣吹噓孰匪生成之物榮
身有自稽首知歸伏念某螻蟻微軀駑駘鈍質猥以一
言之寤濫先千佛之題豈學術之能然實神明之所畀
爰從叨冒益重憂虞或人非鬼責之可防或陰伏陽愆
之生疾况平時必有悔尤之積在今日豈無禳祓之因
式就誕辰肅陳清醮自惟德薄敢言黍稷之非馨苟以

信孚猶曰蘋蘩之可薦，冀垂皇鑒。幸察丹衷，庶盱蠻之
潜通。期妖氛之可殄，自頂至踵。誠知報塞之難，由身及
家。舉賴扶持之賜。

生日設醮亭午青詞

李元應

光輝萬彙，方當日舍之中。瑩露一純，欽竚二人之格。仰
藂霄之有庇，啟秘籙以惟寅。敢冀神明俯矜，愚陋宣臻
福慶。申錫壽祺，作善降祥。有高天之在上，至誠不息。如
皦日之難欺。

生日設醮散壇青詞

一形所覆二氣攸資主籙報符既有典司之重依科奉
教爰開醮謝之文敢以誕辰虔遵秘籙借虛暉于雲篆
貢忱款于朱章嘉事備成神光臨矚集茲善願度格純
禧七世先靈冀悉蒙於超度一門親暱俾咸保于乂寧
綏福履以無幾錫年齡而有永敢忘勵翼仰答顧歆

夫人生日禳謝設醮青詞

陳丞相

盈虛消息是為物理之常悔吝吉凶莫非已求之自取

殫誠赤仰達圓清伏念臣妾幸叨封國之榮濫竊從夫
之貴每懷媿負益用戰兢疾病相仍已迫桑榆之景滿
盈是懼莫酬造化之恩適當孟夏之辰爰屆始生之月
輒陳菲薦上瀆高真爾壽爾昌已荷乾坤之覆載將安
將樂更期雨露之生成

夫人生日禳謝設醮青詞

幼而壯壯而老固物理之盈虛誠則著著則明本人情
之清淨俯輸悃悃仰達穹蒼伏念臣妾中饋未能暮齡

侵逼既蒙有家之願復叨封國之榮名秩超踰已劇從
夫之爵恩光廣大未加配德之方屬逢孟夏之辰復屆
始生之月敢陳菲薦上瀆高真爾壽爾昌皆本自天之
佑將安將樂上祈覆物之仁

陳相生日屬吏祈禳青詞

炳炳台符祥應誕彌之月昭昭天鑒莫增有永之年敢
輸祈禳之誠更瀆蓋高之聽伏念某等分甘愚賤職稱
使令依光乎兩兩之躔竊庇于渾渾之府欣逢慶事敬

發寸心仰干造化之私少答生成之賜伏願恩使少保
觀使大觀文相公臣某壽齊南極福比東溟與國同休
翊宗社無窮之秘錫公純嘏伴蓬壺不老之休



五百家播芳大全文粹卷七十二

欽定四庫全書

集部

五百家播芳大全文粹卷七十三

四三

詳校官侍郎臣劉躍雲

助教臣常循覆勘

總校官編修臣王燕緒

校對官編修臣盧燧

謄錄監生臣朱學濂

欽定四庫全書

五百家播芳大全文粹卷七十三

宋 魏齊賢

葉 棻同輯

青詞

本命

本命日祈禱設醮青詞

趙大資

遭世甚隆母子荷非常之眷疏封優渥婦姑蒙不次之

恩身獲享於壽康家克臻於平泰雖賴君親之祉實憑造化之私屬元命之御辰當季冬之紀候備陳妙供肅建靈場庶昭格於璿霄許默延於飈馭伏願上穹垂祐列聖鑒衷回曲照於桑榆矜至情於螻蟻洗心奉道悉蠲既往之愆稽首投誠密介方來之福雲天在望肝膽不欺

本命年祈禱設醮青詞

所助者順故禍福之應靡常有感必通則天人之際何

遠屬元春之新朔得本命之始年肆啟青塲度數丹悃
伏念臣蕞爾微品陶乎大鈞出於零丁孤苦之餘備矣
險阻艱難之事仰由帝力浸被國恩曾天爵之弗修乃
勢榮之久竊致君利物故常愧於食浮行已宅心幸莫
逃於日監惟歲逢庚午之肇序實臣生甲子之一周支
干浹歷而起元星氣循環而復始天道成於不息人生
稟而又新恭惟依靖館之嚴順迪靈科之秘敢言報德
期以迎年伏冀上真鑒臨列聖乎祐變而復貫既載見

其賦命之辰草以鼎新願更錫以降衷之祉

本命日祈禱設醮青詞

叅稽金錄考迹琅函聞消災度厄之名知延壽益算之
力敢祈聖智洞察凡愚爰念某早歲崎嶇晚途澶泊無
片善可言於帝闕無寸長可奏於天閣昔五十三已規
規於閒退今八十一尤慄慄於屯危謂非錫福于上蒼
何以保身于末世重伸悃款虔扣高真造化涵濡願憑
雨露之施衰枯優渥益保樛櫟之生意切辭繁情深語

拙

本命年祈禱設醮青詞

陳履常

天運有叙六十歲而一周人心所歸五千言之大典惟
此庚辰之歲實為本命之年數之所窮理有必反不勝
恐懼敬用祈禳祇按舊章修陳薄禮惟衆真之厚眷下
顧敝廬假青章之微詞仰陳危懇多生之罪願以懺除
百歲之年敢祈陰錫道心浚發妙行具修疾癘不侵善
祥來集誓言依真教以畢餘生溥及羣情同期勝福

本命日祈禱設醮道場青詞

陳元應

大緣廣覆監觀靡忽於細微至道難名讚仰莫窮於幽
遠爰忱誠之必至則上靈之可通况不言而信已乎故
無私而奉必極時丁獻歲日次戊辰實小臣有生之年
亦君子履端之始式陳蘭醮載誦寶書庸謝往愆率祇
卑聽伏冀萬靈扶善列曜降祥永嚴四域之尊請勤夙
夜庶叨五福之備聊慰老成將酬穹昊之恩誓擴精純
之悃

祈禳賽謝

赴召泛海保安青詞

煙棹雲帆悵未觀於滄海飛樓傑觀恍已覩於神山躡
仙蹤者相望通帝所而不隔敢憑淨供輒布忱辭伏念
臣出山林之寒家襲文章之末伎當靖康之初載列侍
從之下陳閱歷十年艱難百謫方執喪於大墓遽起絕
於全師蓋嘗伏地而辭不容循墻而避抗秦晉強悍之
寇保巴蜀忠義之民雖慙罔功已殫綿力滿篋存興於

謗牘免官方誤於嚴誅遽奉制書俾歸軒陛與仲弟同
加收召蒙聖主曲賜保全自憐東西南北之人難陪詩
書禮樂之士決意委家而去敢言俟駕而行泛巨浸以
無垠慄扁舟之可憚伏願蓋高能動至鑒不違達零落
之初心保孤危之晚節期有濟于國事庶無負于家聲

奉使金國作醮保安青詞

葛謙白

洪造無私雖莫求於聲臭寸誠上達或有異於感通輒
伸翼翼之誠仰瀆高高之聽伏念臣智難周物才弗翫

人雖修聘寶齡濫預光華之遣而乘軺異國豈無衝涉
之虞是用歸命淵衷乞靈冲境恪趨黃宅虔拜綠章肅
揚諷頌之音廣致苾芬之薦所冀九天降鑒三境垂慈
興憐於一介之微均祐於三節之衆五藥弗用各增平
粹之和六轡既均無復虺隤之患遵陸無愆於雨淖行
艫不阻於風濤既備寫於翹誠願默垂於孚佑

赴任保安青詞

林豈塵

升斗竊廩固慙仰給之私稚荦登途敢望全安之賜垂

休有自昭荅自宜伏念臣得祿代耕闔門就食從遠方
襁負之至賴洪造帡幪之安天高而聽甚卑允諧虔禱
物薄而可用重式荅龐恩嚴潔祠宮敷揚科記俯殫方
寸上達圓穹靳降格於三清錫康寧於百福獲遂養親
之願益奉怡顏更堅報國之忠自求多福

赴任保安青詞

黃泰之

百年俯仰圉陰陽造化之區千里馳驅涉得失憂虞之
境瀝丹衷而懇禱仰洪造以皈依伏念某蒲柳微軀塵

埃賤職懷鉛而抱槩敢言發策以決科千佛名經誤冠
太常之第一行試吏濫分南郡之符材薄事叢人輕責
重外則曠瘵之為懼內焉疾疢之是虞屬將首於征途
爰肅陳於清醮庶動高真之降密垂覆露之恩由公及
私既安且吉壽山福海資道力以彌昌瘴雨蠻烟伏皇
風而一洗

新居禳謝設醮青詞

經營土木之功始終十稔觸犯陰陽之禁周徧八方每

積憂兢莫遑寧處謹消令日式按仙科諷築笈之秘文
薦蒲庖之薰供庶憑丹悃仰屈真游舍前日之咎愆莫
自今之方位神人不擾稚耄以安

考室禳謝設醮青詞

鮑欽止

天有顯德惟陰隲以相厥居人用丕欽奉周旋而無敢
失幸苟安之有自輒昭荅以告虔伏念臣粗承先業之
餘未遂肯堂之念是用往歲爰勅新居非誇輪奐之工
敢在風雨之蔽重念尤興於土木豈能無戾於陰陽願

輸危懼之懷敢後皈依之請當陽和之用事正福生之
有基敬承羽流虔揚藥笈嚴蠲蝸舍攀屈飈輪仰祈洪
造之私茂以大來之慶康寧壽考少酬母氏之劬勞枝
葉本根不墜家聲之簪紱

考室禳謝設醮青詞

孫仲益

栖遲末路獨行萬里之餘晚晚流年未成一厘之託爰
屬歸田之日亟從問舍之謀永悼窮猿失木之悲遂諧
脫兔投林之喜所願容膝南窓之下坐觀六十年之非

寧復存心北闕之中大庇千萬間之意諏龜視日除地
庀徒䟽決溝川誅鋤草莽甚虞戕害一時昆虫之命更
懼驚觸四隅神靈之愆迺即家庭躬陳菲薦命羽衣之
勝侶誦藥笈之真文俯輸螻蟻之誠仰企雲霓之望蠲
除瘡癘膺大福祥上有天臨旁無鬼瞰俾同胞之兄弟
共臻黃髮之期遂徼福於子孫永保青氈之舊

墳庵落成禳謝設醮青詞

劉仲遠

齋戒事帝惟誠意以能通疾病呼天尚哀情之可憫念

臣傳舊學於詩禮窮末技於藝文縑縷一官艱難半世
罪盈小已禍逮老親荼毒不天殞絕無地今首丘而俟
死尚廬墓以偷生自結茅茨僅庇風雨興建土木濬治
水泉顧茲里域之中恐犯神明之舍寒宗冷族雖無瞰
室之憂穴處巢居尤有嘯梁之懼特延開士恭按仙科
不敢徼恩惟祈謝過伏望高真降鑒列聖垂慈亮以哀
誠被之道蔭俾孤臣保餘年於草野使先人安靜寐於
丘山誓堅始終之心用報生成之德

上元祈安設醮青詞

趙德莊

都會之地民物至繁習俗之愚閭里多罪爰以三元之
首率時衆志之新伏願戶識孝慈人知忠厚五風十雨
有來九扈之祥萬歲千秋以永六龍之慶

上元祈安設醮青詞

陳丞相

天高聽卑豈凡庸之有隔意誠心正或盼嚮之可通輒
瀝丹衷仰干洪造伏念臣遭逢特異謏薄何堪四紀宦
遊常亡懷而履坦貳公忝竊尚苟祿以貪榮雖量已之

甚明顧乞身而已幸獲歸休於舊里惟沉痾之在身謹
擇初元肅陳清醮伏願臣一門內外兩宇康寧已超名
利之途庶無後悔少遂清閒之樂尚保餘齡

為父少傅祈安設醮青詞

林豈塵

老稚官游每抱滿盈之戒陰陽代謝豈無消息之虞惟
冀免災敢云要福伏念臣某父某年垂七十位亞三公
辛勤白屋之起家毚勉丹衷之報國幸一門內外叨廩
稍者十餘人念累歲晨昏望江壩在數千里懼愆尤之

倚伏適星宿之推移敢因月正之上元屬值日辰之先
甲謹延道侶為叩高真輒紓醮設之誠寧有祈禳之意
情惟知止念欲就閑伏願大而邊境之安寧次則親庭
之強健掛冠得請庶無一簣之虧問舍有期永遂全家
之樂

元旦禳災設醮青詞

洪覆至神實不期於報謝羣生多故誠有賴於祈禳輒
輸悃幅之私仰瀆高明之聽伏念某遭逢盛際蒙被餘

恩賦形宇宙之中殆將四紀竊祿江淮之上幾及二年
雖身曲盡於勤勞豈事舉無於過誤慮愆尤之浸廣恐
譴責之陰加粵自元朝當修於醮事及茲歲暮輒按於
科文祇建壇場肅陳香火伏願上真保佑列聖扶持官
路亨通無謗傷之橫至私門安燕絕災釁之潛生福逮
親闈慶延子舍

為衆禳災設黃壇青詞

程子山

惟皇上帝子惠困窮今此下民寇攘姦宄蓋人為之不

靜致天意之未回顧河洛之妖氛尚纏神極眷岷峨之
王氣幾暗邊塵駭大厦之將顛渺極橫流而罔濟唯有
剗心妙道託命至神人雖厭於亂離兵孰能去天如欲
於平治敵不足平爰協靈辰祇嚴閔館遡圓霄而瀝懇
衽閭闔以陳辭伏願降思穆清淤觀昭曠排玉房而來
狩率瑤圃以駿奔紛動羽旄儼臨壇宇覲少留於聰聽
容畢罄於精衷曾是更生銜夙恩而莫報敢期終造徼
後福以無他早建中興咸躋壽域

為衆禳災設醮青詞

熊子復

道應無方禱而必應天災有數修則可禳永惟建土之
封實在閩中之部承去歲荒歉之後疾疫間興當入夏
播種之初甘雨未降欲潛消於厄會用祇按於冲科祓
外臺春貢之堂企上界真遊之馭願矜衆欲盡滌諸殃
豈惟藩郡之蒙休亦俾漕臣之逃責

上元祈年青詞

春華有序肇見於初元道妙無方夙聞於善應輒常時

之官燕為闔郡之民祈禱茲黃堂瞻彼紫極罄愚哀而
上達企真馭以來臨爰芘是邦俾蒙諸福時和歲豐而
有休嘉之氣家給人足而無愁恨之聲主既寬憂吏亦
逃責

為衆禳災設醮青詞

天維顯思誠故能格民亦勞止患庶可銷永言京岷之
封實控江畿之會緣暑雨之驟作致疫疾之荐興是用
禱公宇以齊心企真游而請命簡在上帝孚佑下民所

欲必從願悉蠲于災害自今以始望更錫于豐登

為衆禳災設醮青詞

林豈塵

臨下有赫妙造化以難名求福不回或至誠之能動輒
輸悃幅仰瀆高明伏念臣等試吏未優受才甚薄頃緣
兩歲旱禍相仍爰涉今年孽殃猶甚獄訟滋起怨謗橫
生夢寐見於不祥官吏為之震恐今福莫大於無禍敢
恃祈禱而天雖高而聽卑庶幾降格適值先天之節敬
誠淨醮之儀宣北斗七星之科慶中元四始之會伏願

叢霄洞鑒衆真護持閔茲窮谷之毗一洗如山之釁自
今以始鑒陟降之小心俾熾爾昌荷生成之大賜

為衆禳災設黃錄醮青詞

孫仲益

道大弘濟物之功人窮罄顙天之禱自中原稔兵戈之
禍而一方纏殺伐之凶劫火熾然彌滿萬里邊塵瀕洞
連絡百蠻慟哭干霄肝腦塗地積骸蔽野醜血流川走
燐宵明遊魂晝哭風雨暴露靡一坯之覆春秋奠餽無
半菽之分念衆生曠劫嬰釁之深丁一時大盜稱兵之

衆貨財留戀骨肉牽聯淪溺愛河備嘗諸苦漂墮鬼谷
無有出期是用仰紫極之真游集黃冠之勝侶琅函藥
笈藏室弘開絳節朱裳靈遊來下哀憐多罪拔出三塗
金飯玉漿有求皆至尻輿神馬無往不通破昏暗瑣而
永離九地之幽乘逍遙遊而共集諸天之上

祈安設醮青詞

陳德明

林林摠摠羣居於照臨覆載之間擾擾匆匆相靡於是
非得喪之域竊慮愆尤之積敢忘禳謝之懷竊念臣偏

親六十餘合門數百指方厲行年之更始尚虞惡曜之
來臨仰叩威靈大作帡幪之厦屋庶令竟歲常遊駘蕩
之春風

祈安設醮青詞

下民無知禍福隨機而感召高真善貸災祥每監於祈
禳俯竭丹衷仰干洪造竊念某等邑居窮嶠俗習淳風
雖無商賈之阜通粗有耕桑之飽煖知為善之最樂思
防患於未然欲銷火盜疾疫之憂冀免水旱凶荒之變

迺涓穀旦特啟醮筵度命羽衣之流恭演琅函之典伏
願齋誠上達仙馭下臨保茲蠢蠢之生降此穰穰之福
無災無害三光全而寒暑平時雨時暘五穀熟而民人
育

祈安設醮青詞

張正巳

隆天厚地共叨覆載之恩衰病殘年尤賴護持之力輒
伸微懇仰叩洪鈞伏念臣山林故家韋布下士慕前世
近古之學讀先人不售之書雖無一時之顯功獨有三

世之陰德事君以道期不負於初心行已盡誠念敢忘於先訓屬神州之倣擾當王室之艱危頗思痛哭以獻言不料積憂而成疾志意槁落步武蹒跚謹按仙科恭延淨侶伏願高真降鑒列聖儲休不憑上醫盡去末疾唯鑒室之是戒庶嘯梁之無虞誦五千言益味于靈文誓二百指同依于至道

賽願設醮青詞

孫仲益

雲天溥博大庇羣生螻蟻么微上千洪造伏念某紹興

辛亥歲出守臨安府宜行妄發觸罪南遷仇怨滿前禍
奇不測投荒萬里未知稅駕老幼百口狼狽無歸僑寓
馬跡一島之上而村舍庖烟上薄煬突久燥欲焚天誘
其衷夜中驚爆應時救護得免燔蕪弟婦胡氏猶子強
宗三被危疾救藥靡効賴天之佑得免餘息嬰兒壽老
免乳之疾母子沾危亦或亡恙皆臣弟峴齋心啟許前
後七筵敢用昭告孀嫂劉氏頃緣幼女蚤逝願追福於
後身侍妾鍾氏又以老臣行年懼挺災於惡曜逮茲穀

旦祇奉靈科虔誦秘文熏修菲薦誕惟仙聖靡隔塵凡
哀閔手足急難之情保全駒犢孤危之命或伉儷之際
若幽顯之間蠲除回祿之災消弭歲星之厄仰憑帝力
式副弘願俯輸危懇用伸報禮雖巍巍之表莫可管窺
而區區之誠庶幾芹獻洗心歸命稽首投誠誓畢餘生
永依至道如貧賤富貴壽夭之數固有定命不敢因祈
而水火盜賊疾癘之虞出於非常尚冀加護

祈安設醮南嶽青詞

昊穹綿邈雖杳默而難謀螻蟻么微倘精誠之可格敢
殫悃幅仰瀆高明伏念臣賦質顛愚奮力寒苦頃塵要
路叨位宗工補袞和羹莫致將明之效敗財覆餗遽貽
顛躓之憂身投遐方禍及弱息一居謫籍四閱年華每
俯伏以籲天祈哀矜之逮下冀今危窘獲遂安全神明
所綏未淪於死所仁聖在上復許於生還祇荷寬恩徒
居便郡載趨聖境恭啟靈場維喬嶽之名區實真仙之
福地薄展蘋蘩之薦罄陳肝膽之私尚冀聽卑終垂全

佑蠲除宿釁敷錫嘉祥使晚歲偷安無重嬰於灾沴闔
門蒙福長共保於安康庶令含識之倫不失有生之樂

祈安設醮青詞

黃泰之

囿陰陽之域烏能無憂患之防叨覆載之恩何以表瞻
依之素爰披愚款仰叩高真忘其螻蟻之微薦以蘋蘩
之潔惟一念之誠不爽庶萬寶之鑒潛通悉蠲已往之
愆益茂方來之祉雲車風馬肅觀咫尺之臨福海壽山
願契百千之祝

祈安設醮青詞

劉忠肅

一氣清明體神而妙萬物三靈昭晰福善而降百祥顧
衰慕之餘年脫艱危於死地重蒙優詔易處近邦望館
御之非遥念歸依之有素恭仗蘋蘩之薦薄陳犬馬之
私敢冀聽卑曲垂乎佑伏念臣頃遊孤宦叨位宗工寵
祿過分而易致於滿盈智識昏愚而寢嬰於罪戾身投
遠裔禍萃私門比獲生還實踰初望下同子舍旁及天
倫俱被上恩悉從內徙雖未離於謫籍知幸免於畏途

尚祈洪覆之兼容更冀大明之委照載加矜惻終賜保
綏使歸老丘園不愆於微志貽休嗣續無隕於素風弭
灾沴於方來保歡康於晚歲

賽願設醮青詞

言念曩歲獲拜琳宮惕仰威靈祇布誠懇殆涉半世復
尋舊遊自忻疵賤之餘生久沐生成之大德猶干微祿
未泯此身冀深謝於積愆思少酬於前誓願已衰之門
戶尚欲扶持慨將老之年齡或堪龜勉敢憑洪造仍布

風心

禳災祈福設醮青詞

天道助順視聽近而自民至誠感神沐浴可以祀帝仰
緣聰鑒冒進忱私臣稟此微生陶於大化委形乾造已
畏於盜天受祿聖辰更虞於竊位毀譽是非之交至吉
凶悔吝之由興曾是大憂叢之小已順有生而炊累豈
繫人謀付常序而居安實煩帝力

祈福懺罪設醮青詞

寵祿叨踰深荷國恩之厚室家燕喜仰蒙帝力之闋雖
天地無責報之心而螻蟻有啣感之志輒涓穀旦躬造
殊庭繙寶笈之盛儀會上真之飈馭躬請命稽首輸
誠伏願精意升昭高穹降監凡罪辜之既往咸許蠲除
或功利之方來尚期積累介多祥於壽母錫餘慶於詵
孫惟孝與忠敢內欺於俯仰自頂至踵庶永託於生成
禳灾設醮青詞

乾高定矣以言乎位則尊卑之莫交日監在茲苟著其

誠則影響之私格爰建迎年之醮敢伸事帝之虔公舍
肅嚴法壇敬請伏念臣機靈甚淺德性弗克承教經之
素風起如綫之孤緒浸煩帝力久竊勢榮念無功於人
知莫酬於覆燾惟不欺之志或可薦於神明越自比年
稍愆常序私門紛糾於多故外患起伏之不常僅歷秋
冬連鍾哀疊仲子奪於強仕季女逝於已行惕焉求端
凜不知措蓋福過者灾有時至道盈者天之所虧履變
以兢悼心若隕恭念九清之上不遺一物之微以祓除

愆尤為仁以洗滌憂患為德會歲元之更朔稽寶式以
肆儀兢兢在心既自新於修省明明居上或敢怠於祈
禳紫霄無聲景緯在望盡物乎外潔清於中伏願三境
鑒通列真臨聽撫有生之累一視以仁推大道之原曲
成乎物錫安全之運於新歷蕩滯厄之會於故陰公私
救寧族屬康靖使沐浴之惡獲永事於大神雖鷓鷯之
微亦不顛於常分

禳災設醮青詞

覆幘無私孰非陰騭精神有感固可潛通伏念臣久積
罪愆日虞禍罰仰陳再造迄獲自新尚惧意雖至而未
孚謹既深而荐及自春徂夏兼疾與憂加以洗垢之迹
已形觸網之傷可畏矧微官之數免且舊德之寢衰歷
數哀籲之言敬冒盖天之聽式祈陰佑宅遠安全止冀
弭災不敢徼福倘蒙緩死俾未墜於箕裘何可謝生但
願堅於名節

禳災設醮青詞

歸心大道託命至仁生世今八十三年聚族殆五千百
指天行有伏每懷疾癘不測之憂世事多虞又懼水火
非常之變輒伸丹懇仰叩大闔曲軫鴻私俯從人欲蠲
除疾恙洗滌罪愆門戶清寧田園登稔養老慈幼有團
藥之喜安居暇日無啼號之聲退省餘生實繫大造雖
乾坤之施義無所謝而豺獮之祭物有固然爰即家庭
恭修報禮固不敢以貪嗔癡僥求元妄之福乃所願者
平安泰優游垂盡之齡

淨獄

淨獄設醮青詞

張之紀

造物至仁衆生迷貪嗔癡之業積惡所感終身陷殺盜
淫之刑小者傷肌刺膚大則穴胃殞首孽由自作性至
不移縱能悔禍懲創於一時復出為惡係累於旋踵茲
用抵法而不已雖得其情而可矜眷此郾城號為劇邑
民煩訟簡有太平淳朴之風歲稔刑清致盜賊弭寧之
效以政和戊戌歲六月二十四日獄空謹按靈科上干

洪造真高真之降格憫下土之窮呼拔罪拯憂益導迎
於和氣洗心易慮使不犯於有司誓與羣生永依大道

淨獄設醮青詞

李文老

國家間暇克仁方徧於九垓圉圉空虛漢律遂收於百
罰幸道承宣之責實繫覆燾之功用照謝於洪私庶導
迎於和氣明謹而不留獄敢矜五聽之精穠藁必有豐
年更賴三清之助

五百家播芳大全文粹卷七十三